



Broj: 04-05-04-1866/18
Sarajevo, 08.10.2018. godine

SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„EFIKASNOST UPRAVLJANJA GUBICIMA VODE U VODOVODNIM PREDUZEĆIMA“

Ured za reviziju institucija u Federaciji Bosne i Hercegovine proveo je reviziju učinka na temu „**Efikasnost upravljanja gubicima vode u vodovodnim preduzećima**“. Cilj revizije bio je ispitati aktivnosti vodovodnih preduzeća i njihovih osnivača (kanton/općina/grad) na smanjenju gubitaka vode u vodovodnoj mreži.

Provedena revizija je pokazala da su gubici vode, u većini vodovodnih preduzeća iz uzorka revizije izrazito visoki, te da u pojedinim preduzećima gubici vode iznose preko 70% od ukupno zahvaćene vode. Tako je u periodu 2015.-2017. godine u 10 vodovodnih preduzeća iz uzorka **količina vode, u iznosu cca. 288 miliona m³ ili 64% od ukupno zahvaćene vode, izgubljena u sistemima vodosnabdijevanja**. Iskazani gubici vode u preduzećima iz uzroka značajno su veći od prihvatljivog nivoa gubitaka vode u svijetu koji se kreću maksimalno do 15%, a u pojedinim zemljama EU do 7%.

Identificirano je više uzroka koji su vezani za visoke gubitke vode u vodovodnoj mreži u FBiH. Provedena revizija posebno ukazuje na **nedovoljno održavanje vodovodne infrastrukture od strane vodovodnih preduzeća, kao i na izostanak adekvatnog nadzora osnivača nad radom vodovodnih preduzeća kojima su povjerali pružanje usluga vodosnabdijevanja i upravljanje ovim vrijednim prirodnim resursom**.

Većina vodovodnih preduzeća nije preduzimala aktivnosti u cilju odgovarajućeg otkrivanja i evidentiranja gubitaka vode, niti su preduzimali adekvatne mjere kako bi se smanjili gubici vode u vodovodnoj mreži. Uprkos visokim gubicima vode, vodovodna preduzeća nisu definisala precizne i mjerljive ciljeve za smanjenje gubitaka vode, niti su vršili aktivnu kontrolu vodovodne mreže u cilju blagovremenog otkrivanja gubitaka vode. Popravke na mreži najčešće su vršene tek nakon pojave vidljivog curenja vode.

Ured za reviziju cijeni da razlozi koje su subjekti revizije naveli kao uzroke velikih gubitaka vode u vodoopskrbnoj mreži (nedostatak finansija, opreme i stručnog osoblja), ne mogu biti opravdanje za nedovoljno održavanje vodovodne mreže, što je jedan od glavnih uzroka nastanka visokih gubitaka vode. Vodovodna preduzeća su neznatan dio realiziranih prihoda ulagala u održavanje vodovodne infrastrukture, dok pojedina preduzeća, u posmatranim godinama revizije, za ove namjene nisu izdvajala finansijska sredstva. Shodno navedenome, konstatovano je da većina vodovodnih preduzeća iz uzorka revizije nije organizovala svoj rad i poslovanje na način koji osigurava nesmetano pružanje usluga i funkcionalnost objekata i uređaja za vodosnabdijevanje, a što su bili dužni u skladu sa kantonalnim zakonima o komunalnim djelatnostima.

Revizijom je konstatovano kako izostanak adekvatnog nadzora i kontrole osnivača vodovodnih preduzeća (općine, gradovi, kanton) dodatno usložnjava teško stanje u oblasti vodosnabdijevanja. Veliki broj osnivača vodovodnih preduzeća iz uzorka ne raspolaže ni osnovnim podacima o gubicima vode u vodovodnim preduzećima koje su osnovali.

Na osnovu provedene revizije, **zaključeno je da se gubici vode mogu i trebaju značajno smanjiti kako bi se osiguralo redovno vodosnabdijevanje građana, smanjili troškovi vodovodnih preduzeća vezani za gubitke vode u mreži i sačuvala voda kao jedan od najvrjednijih prirodnih resursa sa kojima FBiH raspolaže**.

Izvještaj revizije učinka dostupan je na web stranici Ureda za reviziju institucija u FBiH: www.vrifbih.ba.



GENERALNI REVIZOR

Dževad Nekić, dipl. oec.